

11:27-15:21 ABRAMU AINGIA NCHI YAAHADI

Abramu atii wito wa Mungu (11:27-12:9)

Mungu alimchagua mtu mmoja kati ya mataifa yote duniani, ili aanzishe taifa jipya kuwa chombo cha kupeleka baraka zake kwa mataifa yote (taz. 12:2-3). Mtu huyo alikuwa mteule wa Mungu, Abram (aliyeitwa Ibrahim baadaye). Hapo awali Abram aliishi katika mji wa Uru wa Wakaldayo (au Babeli ya kale) ambako watu waliabudu miungu. Ingawa jamaa wengine wa ukoo wake waliabudu miungu (Yos 24:2), Abram alimwabudu Mungu mmoja wa kweli, naye alimtii alipoambiwa ahame Uru.

Alihama pamoja na mkewe Sarai (aliyeitwa Sara baadaye), baba yake Tera na Lutu, mtoto wa ndugu yake. Walisafiri kuelekea kaskazini-magharibi katika bonde la Mesopotamia, mpaka walipofika katika mji wa Harani walipoishi kwa muda (11:27-32; Mdo 7:2-4). Baada ya muda, Abram na Sarai, pamoja na Lutu walihama Harani kwenda kusini kadiri ya agizo la Mungu, mpaka walipofika Kanaani.

Abram aliamini kwamba Mungu angempa nchi bora ya kuishi, ingawa hakujua sawa sawa aende wapi. Aliamini pia kwamba Mungu angemfanya kuwa baba wa taifa kubwa, ingawa mke wake alikuwa tasa, yaani hajaweza kuzaa watoto (12:15; Ebr 11:8-12). Wakati ule Wakanaani waliishi katika nchi ile, lakini Abram aliamini kwa hakika kwamba siku moja wazao wake wangeishi huko badala yao. Alionyesha wazi imani yake katika ahadi ya Mungu alipojenga madhabahu katikati ya makao ya Wakanaani (6-9).

Safari ya kwenda Misri na kurudi (12:10-13:18)

Muda mrefu wa ukame bila shaka ulimsababisha Abram kutia shaka kama nchi ile ya ahadi iliaminika kweli. Mwishowe alisafiri kwenda Misri kutafuta malisho bora kwa wanyama wake (10).

Alipogopa kwamba huenda Wamisri wangeweza kumwua, ili wamtwe mkewe aliyekuwa mzuri sana, alijikinga akisema kwamba alikuwa dada yake. Habari hii ilikuwa kweli, lakini nusu tu, kwa sababu Sarai alikuwa binti wa Tera kwa mke mwingine (taz. 20:12), lakini ilikuwa vibaya kusema nusu ya ukweli tu kwa kusudi la kuficha ukweli wote (11-16). Hata mfalme wa Misri ambaye Abram alikuwa amemdanganya, alikuwa mkweli zaidi kuliko Abram. Bila kukawia alimfukuza kutoka Misri kwa kumwaibisha (17-20).

Abram pamoja na nyumba yake yote walirudi Kanaani (13:1). Katika muda wote wa mambo hayo yeye na Lutu walikuwa wamehifadhi makundi yao, nao waliweza hata kuzidisha mali yao (taz. 12:5,16). Kwa kweli, walikuwa na wanyama wengi sana, hata eneo walilohamia, yaani sehemu za kaskazini-magharibi ya Bahari ya Chumvi, halikuweza kutosha kwa makundi yao wote wawili, hata matata yakatokea kati yao (2-7).

Kinyume cha tabia yake aliyonyesha Misri, hapo Abram aliamua kwa roho ya ukarimu na imani. Alimruhusu Lutu ajichagulia kwanza eneo la malisho ya wanyama, yeye mwenyewe akikubali kuchukua lo lote lililobaki kwa makundi yake. Bila shaka alimtegemea Mungu amwangelie katika nchi aliyomwahidia. Lutu alichagua nchi yote yenye rutuba upande wa mashariki ya Bahari ya Chumvi (8-13).

Mungu alijibu imani ya Abram akirudia ahadi yake kwamba angewafanya wazao wake kuwa taifa kubwa na kuwapa nchi ya Kanaani kuwa nchi yao hasa ya kitaifa. Baada ya hayo, Abram alikwenda katika maeneo ya malisho yaliyokuwa upande wa magharibi ya Bahari ya Chumvi akafanya makao yake karibu na mji wa Hebroni (14-18).

Abram akutana na Melkisedeki (14:1-24)

Ubinafsi wa Lutu katika uchaguzi wake ulimletea matatizo ambayo hakuyatazamia. Kundi fulani la wafalme wa miji midogo ya karibu na Bahari ya Chumvi alipoishi Lutu, walikuwa wamewaasi wafalme wao wakubwa wa Mesopotamia wakachokoza vita. Lutu alitekwa na mali yake yote alinyang'anywa (14:1-12). Abram hakuwa katika hatari yo yote, lakini alihangaika kwa ajili ya Lutu. Akakusanya jeshi la watu 300 wa watu wake mwenyewe, pamoja na majeshi ya majirani zake akawafuata wachokozi walioanzisha vita vile. Akawastusha maadui kwa mashambulio ya usiku yaliyopangwa vizuri, akawashinda, akamwokoza Lutu na kurudisha mateka yote (13-16).

Abram aliporudi alilakiwa na mfalme wa Sodoma, ambaye Abram alimrudishia mali yake. Alilakiwa pia na Melkisedeki, mfalme wa mji wa Kikanaani wa Salemu (baadaye uliitwa Yerusalemu) ambaye,

kama vile Abram, alimwabudu Mungu Aliye Juu Sana. Zaidi ya hayo, Melkisedeki alikuwa kuhani wa Mungu. Kwa hiyo alimbariki Abram, akimkumbusha kwamba, Mungu huyo wala si mwingine, alikuwa mkuu wa mbingu na nchi. Alikuwa ndiye aliyempa Abram ushindi ule mkubwa. Abram alikubali hayo, kwanza, kwa njia ya kutoa sadaka kubwa kwa kuhani wa Mungu, na pili, kwa kukataa kupokea thawabu yo yote kutoka kwa mfalme wa Sodoma. Mungu peke yake alitawala mambo ya Abram katika nchi ya Kanaani. Lakini Abram alikubali kwa furaha kwamba majirani zake wapate thawabu kutokana na vita vile (17-24; taz. Ebr7:1-10).


Agano la Mungu na Abram (15:1-21)

Hapo awali Mungu alikuwa amemwahidi Abram kuwa taifa na kupata nchi (taz. 12:2; 13:15). Imani ya Abram kuhusu nchi ya ahadi ilijaribiwa kwa njia ya ukame na matatizo, na imani yake kuhusu taifa lililoahidiwa ilijaribiwa daima kwa njia ya utasa wa mke wake, yaani Sarai kumpata mtoto. Ilikuwa desturi kwa mume na mkewe wasiopata watoto kumpokea mtoto mwingine na kumfanya awe mwana wao. Kwa hiyo Abram alifikiria habari ya kumpokea mtumwa wake aliyemwamini sana, Eliezeri wa Misri, na kumfanya mrithi. Mungu alimhakikishia Abram kwamba angempata mtoto wake mwenyewe, na katika yeye angepata wazao wasiohesabika. Abram akamwamini Mungu, na juu ya msingi wa imani hiyo Mungu alimpokea kuwa mwenye haki (15:1-6; taz. Rum 4:1-5, 13-22).



Baadaye Mungu alithibitisha ahadi yake kwa Abram kuhusu taifa na nchi kwa njia ya kufanya naye agano kama ilivyokuwa desturi ya nchi ile. Kwa kawaida katika maagano ya namna hiyo wanyama wa sadaka walikatwa katikati kuwa nusu mbili, kisha watu wa makundi mawili ya agano walipita katikati ya vipande vile, wakikubali kwamba kifo kilichowapata wanyama wale kiwapate wao wenyewe, kama wangevunja ahadi ya agano lao. Kwa hiyo Mungu alimwagiza Abram awaandae wanyama (7-11; taz. Yer 34:18).

Lakini katika habari hiyo, Mungu peke yake (kwa namna ya mfano wa tanuru ya moshi na mwenge uliowaka) alipita katikati ya vipande vya wanyama waliochinjwa, kwa sababu Yeye peke yake alichukua madaraka ya kutimiza ahadi za agano hilo. Yote yalitegemea neema ya Mungu, nayo yalipokelewa na Abram kwa imani. Lakini hata hivyo Abram alitishwa na giza kubwa lililomwangukia, kwa sababu agano lingetimizwa katikati ya upinzani, utumwa, hukumu na kunyanyaswa kwa muda wa karne kadhaa. Mungu angeonyesha uvumilivu kwa watu wa Kanaani na



kuwapa nafasi ya kutosha ili watubu, na baada ya uovu wao kuzidi kabisa, angewaruhusu Waisraeli kuwaangamiza na kuteka nchi yao (12-21).

Kusudi la Mungu la kuwajenga wazao wa Abram kuwa taifa la Israeli, zaidi lilikuwa kulitumia taifa hilo ili limlete Yesu Mwokozi. Ahadi ya Mungu kwa Abram kwamba katika yeye watu wa ulimwenguni kote wabarikiwe, ilitimizwa katika Yesu Kristo ambaye, kwa Yeye watu wa mataifa yote wanaweza kupokea wokovu wa Mungu. Katika hali ya pekee, Yesu Kristo alikuwa mzao wa Abram aliyeahidiwa (taz. 12:3; Lk 1:54-55,72-73; Gal 3:16). Watu wanaompokea Kristo kwa imani, katika Yeye huyo wanakuwa wazao wa Abram, na hivyo wanazishiriki baraka alizoahidiwa Abram (Rum 4:16-17; Gal 3:6-9,29; Efe 3:6). Raha na amani (ya sabato) wanayopewa na Mungu ni zaidi kuliko makao katika nchi ya Kanaani; ni wokovu ulio katika Yesu Kristo (Ebr 4:6-10).